

*Aunque ainda Museo Arqueologico no ta sigur:*

# Tin diferente indicacion cu skelet haya den excavacion ta di hende muher



*E deramento*

ORANJESTAD (AAN) -- Despues cu Museo Arqueologico a caba cu e excavacion di urgencia na un fundeshi na Santa Cruz 12-E, DIARIO a acerca Drs. Raymond Dijkhoff, Arqueologo di Museo, pa obtene mas detaye tocante e resultadonan di dicho excavacion te aworaki. Drs. Dijkhoff a duna nos redaccion un splicacion extenso, cuminzando pa elabora riba e posicion con e persona a worde dera.

"Pa prome, e individuo tabata dera den orientacion noord-zuid. Esaki ta un manera hopi comun di deramento den e Periodo Ceramico (1000-1515 d.C.). Aunque no ta existi un patronchi fiho den ki direccion hendenan ta dera, tog den e caso aki Noord-Zuid ta hopi comun.

Otro aspecto interesante ta cu e ta dera riba su lomba. Hopi biaha nan tabata worde dera den posicion di fetus (entre otro, durante e periodo Pre-Ceramico di 2500 p.C., te 1000 d.C., esaki tambe tabata comun, na Malmok y Canashito).

Drs. Dijkhoff a acentua cu fuera cu e persona aki tabata dera riba su lomba e tabata casi tene e cazuela den su man drechi. Tambe algo otro inter-

esante ta cu su braza robes tabata bin riba su heup, pero falta su man lens, y ademas basta interesante ta cu su pia lens si tabata dobla pero su pia drechi tabata troci, loke ta algo nobo.

"Na prome bista riba e heup, e ta muestra di ta muher, pero nos no por ta sigur di esaki ainda pasobra door di presion di santo riba dje el a kibre, mescos cu e cazuela.


Ta hopi dificil pa wak den cabes si ta homber of muher, of saca afo su edad, pasobra full skelet ta masha ta garna, pero e cachete riba prome bista ta muestra cu e ta muher. E ta confirma si cu loke nos a pensa prome cu e tin cazuela, cu tin un angua y raspa di cassave cu ta cosnan cu hende muher ta haci, e datonan cu nos a haya ta confirmando esaki.

E di dos fase ta bay muestra si tur e informacion aki ta corecto", Drs. Dijkhoff a comenta.

## MESTER SIGUI INVESTIGA

Kico mester haya sa ta di e skelet, e Arqueologo ta splica asina aki:

"Mester haya sa ki ta su sexo, cuanto aña e persona tabata tin ora el a muri, su estatura, y si e tabata tin malesa. Aun-



*Parti di e cazuela, diameter: 19 cm.*


que malesa ta hopi dificil pa detecta pasobra skeletnan hopi biaha ta den mal estado, manera esaki cu nos a caba di haya.

Nos tin suficiente weso largo cu nos tin chens pasa e estatura di e persona. Lo cual ta edad, si nos por saca e cachete intacto nos por haya sa e edad di e persona.

Sexo di e heup ta dificil pa bay wak si ta homber of muher pasobra e ta hopi garna. Nos tin cu bay wak algun punto na su cabes.

Ultimo cos cu nos por haci cu skelet, si nos kier sa exactamente ki tempo e persona aki a worde dera nos tin cu bay data skelet segun e metodo di C-14 (datacion di radio-carbon) loke mester worde haci den laboratorio den exterior, p.e Hulanda, si enberdad e ta bal la pena haci esaki, pasobra ta hopi costoso".

Den otro articulo por sigui lesa riba mas característica di e obhetonan haya den e excavacion aki, y ki tipo di poblacion a habita Santa Cruz, segun e informacion proporciona pa Drs. Dijkhoff. Por observa hunto cu e articulo aki mas potret tocante e hallazgonan cu a haya durante e excavacion di urgencia aki.



*Hangua di cocolishi di 5.5 cm largura y banda di dje raspa pa cassave traha di quartz.*

**TELEFONNAN DI DIARIO**  
**826747- FAX 828551**